

# 李靜齋先生年譜初稿

鄭喜夫

先生姓李，名望洋，乳名水溢，字子觀，號靜齋。先生族譜所載宋代始祖珠，爲觀文殿大學士綱（字伯紀；福建邵武人。徽宗政和二年進士。欽宗靖康初爲兵部侍郎，金人入侵，主戰被謫。高宗南渡，首召爲相，整軍經武，力謀恢復；乃帝意圖偏安，黃潛善等復忌而沮之，未幾罷去。紹興十年卒，予諡忠定。享年五十有八。著有易傳內篇十卷、外篇十二卷、論語詳說十卷、文章歌詩奏議百餘卷，又有靖康傳信錄、奉迎錄、建炎時政紀、建炎進退志、建炎制詔表簡集、宣撫荆廣記、制置江右錄。）之孫。綱繼傳孟，孟傳珠。珠官提督，當宋、元之際，干戈未定，自汀州避難寧化之石壁村。娶吳氏，生子五：金德、木德、水德、火德、土德。五人皆盛傳，枝葉繁茂。


火德娶伍氏，自寧化移居上杭。其爲人忠信篤敬，家殷實富厚，樂善好施，人咸敬之。遇貧寒者，必慰諭再三，誘勉以勤作，而周濟之；故多感其言而致溫飽。饑歲，富戶或閉倉遏糶，以俟長價；輒獨開倉平糶，貧者貸之，不能償者則紓之，無吝色。夫婦年登六十，僅一女，無男嗣。嘗遭一悍媼詈爲「老絕後」，返家俛首無語，迴思其言不覺淚下，伍氏問知其故，力爲懲息納一側室，因娶陳氏爲妾，未六載連舉三子。其後有慶三郎者移居邑之湖坑。迨至元末，李志甫犯法獲罪，恐有同姓之累，有淑遜者續遷至南靖油坑。

油坑始祖淑遜，其四世孫善政（六滿）因族大人衆，復移居同縣吳宅埔頂。傳至十世孫禎藝（字啓香，號端苑），清仁宗嘉慶年間，其子若孫或仍住吳宅，或渡臺南而移住嘉義縣他里霧（今雲林縣斗南鎮）地方定居；或渡臺北而移住淡水廳擺接二十八張庄（今臺北縣中和鄉平河村），並祀禎藝爲臺北開基祖。

嘉慶九年，先生曾祖振庚公、祖父克茂公，祖母鄭氏、父天聽公等相偕自南靖吳宅故里東渡臺灣。初居擺接二十八張庄。振庚公即卒

於是處。宣宗道光六年，克茂公因閩、粵械鬥，挈眷遷往噶瑪蘭廳頭圍保頂埔庄（今宜蘭縣頭城鎮頂埔里），務農維生；遂爲蘭籍，而祀振庚公爲開蘭始祖。

附：宜蘭頭圍頂埔李家世系圖



清宣宗道光九年己丑（一八二九），先生一歲。

九月二十四日（陽曆十月二十一日）戌時，先生生於福建臺灣府噶瑪蘭廳頭圍保頂埔庄。是年，先生之祖父克茂公、祖母鄭氏俱健在；父天聽公三十二歲；兄朝波（字光釗）三歲。（祖父母及母簡氏歲數待查。）

清宣宗道光十年庚寅（一八三〇），先生二歲。

清宣宗道光十一年辛卯（一八三一），先生三歲。

清宣宗道光十二年壬辰（一八三二），先生四歲。

清宣宗道光十三年癸巳（一八三三），先生五歲。

清宣宗道光十四年甲午（一八三四），先生六歲。

清宣宗道光十五年乙未（一八三五），先生七歲。



清宣宗道光十六年丙申（一八三六），先生八歲。

是年，先生始受書。嘗從祖母鄭氏讀。時，先生家道頗佳。

清宣宗道光十七年丁酉（一八三七），先生九歲。

清宣宗道光十八年戊戌（一八三八），先生十歲。

清宣宗道光十九年己亥（一八三九），先生十一歲。

清宣宗道光二十年庚子（一八四〇），先生十二歲。

是年，先生祖母鄭氏卒，祖父克茂公爰命先生父天聽公兄弟分爨，三房各承產業，衣食俱足給。先生循循幼學庸如。未幾，天聽公因分得之田產遭水冲沙壓，積欠纍纍，不獲已變賣償債，遂至家無立錫，一貧如洗，先生亦瀕於廢學爲人飼牛之境。

清宣宗道光二十一年辛丑（一八四一），先生十三歲。

清宣宗道光二十二年壬寅（一八四二），先生十四歲。

清宣宗道光二十三年癸卯（一八四三），先生十五歲。

清宣宗道光二十四年甲辰（一八四四），先生十六歲。

是年，先生遵父命，負笈堂叔景芳家，從朱品三先生受業。因賢師益友之教誨薰陶，先生自謂進德良多，朱先生深爲激賞，預料異日學必有成。每歲元旦後，必親抵先生家，力勸天聽公曰：「汝斷不可使是子廢學，吾不計束修，總要是子來學，則吾心慰。」先生感其意，事之如父，且倍加篤志力行焉。

清宣宗道光二十五年乙巳（一八四五），先生十七歲。

是年，先生娶徐氏（頭圍保人）。

是年，先生三弟戊己（字望畊）生。

清宣宗道光二十六年丙午（一八四六），先生十八歲。

三月二十日，先生原配徐氏卒。

清宣宗道光二十七年（一八四七），先生十九歲。

是年，先生業師朱品三先生卒，先生雖不能盡心喪之禮，然亦不敢稍遺餘力。

清宣宗道光二十八年戊申（一八四八），先生二十歲。

是年，先生設館訓蒙以養雙親。晝間殷勤訓課，入夜則溫習舊業。

。每至三更五鼓，膏火不繼，則唯焚香條照字讀之，而不敢告家人也。凡有所作，則持以就正於俞昭文先生。如是者五、六年。

是年，先生四弟加令（字望高）生。

是年九月，噶瑪蘭廳境因風雨成災，壓毀田園及房屋不計其數，壓斃一百三十餘人。

清宣宗道光二十九年己酉（一八四九），先生二十一歲。

清宣宗道光三十年庚戌（一八五〇），先生二十二歲。

是年六月初一日，噶瑪蘭廳西勢大湖庄突起旋風及降雹，損傷田園稻作及菜蔬。

清文宗咸豐元年辛亥（一八五一），先生二十三歲。

清文宗咸豐二年壬子（一八五二），先生二十四歲。

清文宗咸豐三年癸丑（一八五三），先生二十五歲。

清文宗咸豐四年甲寅（一八五四），先生二十六歲。

是年，先生以院試取進淡水廳學爲附生，而硯耕如故。清夜自思，以爲如斯猶非治生良策，故發憤習舉業，窮且益堅，不墜其青雲志也。

是年，邵衡任淡水廳學訓導。（後卒於官。）

是年八月，噶瑪蘭廳人吳瑤及林文英糾衆佔領廳城，自號「廳長」，派徵租稅，準備大舉。署噶瑪蘭廳通判楊承澤募義勇分路與抗，頭圍縣丞王衢誘殺文英，繼而北路協副將曾玉明率兵至，瑤敗走，旋被擒伏誅。

清文宗咸豐五年乙卯（一八五五），先生二十七歲。

秋，先生應鄉試內渡。舟行至海山洋面突遭盜劫，兩手腕受傷。歸程又遇颶風，浪濤滔天，船幾覆沒；幸化險爲夷，安抵家門。

清文宗咸豐六年丙辰（一八五六），先生二十八歲。

是年，陳煥署淡水廳學訓導。

清文宗咸豐七年丁巳（一八五七），先生二十九歲。

是年，王壽禧署淡水廳學訓導。

清文宗咸豐八年戊午（一八五八），先生三十歲。



是年，先生舌耕如故。有「茅舍中先生弟子，竹籬外春草秋花。」之句。

是年，李洪署淡水廳學訓導。

清文宗咸豐九年己未（一八五九），先生三十一歲。

八月，先生應己未恩科並補行戊午正科鄉試，中式周慶豐榜第七十二名舉人。是科臺灣府同舉鄉薦者尚有：淡水廳學簡化成、彰化縣學蔡德芳、黃煥奎、陳培松（一作陳培梓）、陳肇興、府學李文元、陳維英、陳謙元、李春波、余春錦等。

十月二十八日，先生長子雙喜生。繼室林氏媛娘所出。

是年，蔡應魁署淡水廳學訓導。

清文宗咸豐十年庚申（一八六〇），先生三十二歲。

春，先生館於蘇炳輝家；賓東情洽。

清文宗咸豐十一年辛酉（一八六一），先生三十三歲。

清穆宗同治元年壬戌（一八六二），先生三十四歲。

九月二十九日，先生次子先甲（學名登第）生。繼室林氏媛娘所出。

是年，先生友人同里楊士芳（又名一芳，字蘭洲，一作蘭如，號芸堂。）舉鄉薦。

清穆宗同治二年癸亥（一八六三），先生三十五歲。

二月初十日，先生長子雙喜夭折，甫五齡耳。二十九日，先生母簡氏卒，先生守制讀禮。

清穆宗同治三年甲子（一八六四），先生三十六歲。

清穆宗同治四年乙丑（一八六五），先生三十七歲。

清穆宗同治五年丙寅（一八六六），先生三十八歲。

九月二十九日，先生父天聽公卒，享年六十有九。先生守制讀禮。

清穆宗同治六年丁卯（一八六七），先生三十九歲。

二月十三日，先生三子先河生。繼室林氏媛娘所出。

清穆宗同治七年戊辰（一八六八），先生四十歲。

六、七年間，先生與友人楊士芳、李鏡如（考取國史館謄錄官，家居不仕）、黃佩鄉、陳搏九等首請噶瑪蘭廳自淡水廳分學。

是年，楊士芳舉進士，欽點浙江即用知縣，欽加同知五品銜，丁母憂回籍，遂不赴任。

清穆宗同治八年己巳（一八六九），先生四十一歲。

十一月，新建噶瑪蘭廳文廟興工。廳初未有文廟，先生與友人進士楊士芳發起倡建，至是始工。此外，先生又倡首捐修廳之仰山書院及建五夫子祠，嘗自謂：「一切分內事，無不竭力爲之。」

清穆宗同治九年庚午（一八七〇），先生四十二歲。

清穆宗同治十年辛未（一八七一），先生四十三歲。

是年，逢會試之期，又值大挑之年，先生入都觀光，隨衆選佛。蒙王大臣考取一等，籤分甘肅試用知縣，遵即赴部領照回家，告祖祭墓。此行，曾經上海。又，五月初五日，曾在都門遊煤山。

清穆宗同治十一年壬申（一八七二），先生四十四歲。

正月二十六日，先生束裝捧檄赴甘供職，堂弟某偕行。夜宿頭圍。二十七日，起程赴淡水艋舺。

三月十一日，先生等揚帆西渡，而風不作。十四日，起南風，船頭舵尾縱翻浪，先生連日昏昏，惟飲水，曲肱而枕，厥苦難堪。十八日，始見福建之南臺，舍舟登岸。其間耽擱八、九日，乘火船青龍號赴上海。曾往梨園聽小劇。

四月初八日，又舍旱。十一日，先生等乘輪過壺口，午後舟次九江城；有過壺口懷古七絕及午後舟次九江城七律各一首。十五日，至漢陽；有漢陽即事七律一首。旋過武昌，午謁年伯湖北巡撫郭柏蔭（號遠堂），因黃鶴樓。十六日，向漢水行，晚泊蔡店；有七律一首。十七日，泊陳家灣宿雨；有詩二首：「不言不語暗鄉愁，漢岸楊枝逐水流；一葉征帆雲霧裡，那堪風雨又當頭。」「楚天風雨漫催詩，滴破鄉心漢水涯；麥隴尚垂黃葉穗，柳隄纔長綠煙絲。幾家卽店炊痕近，隔岸征夫睡起遲；欲報君恩思未逮，此身且自許驅馳。」此兩首爲先生西行吟發端之作。十八日，至漢川縣；有三查壇即事一首：「草



色青青柳色黃，平原盡處落斜陽；風牽錦纜危橋動，雁逐浮雲篆字長。自嘆此身渾似夢，方知到處是他鄉；今宵信宿猶如昨，一枕溪聲欲斷腸。」十九日，舟次沔陽州；有七絕一首。二十日，舟行天門縣境，觀漁；有七絕一首。二十一日，河州渡早晨遇雨；有七律一首。二十二日，至鐘祥縣；曉行即景及漢水懷古各有七絕一首。二十三日未刻，先生偃臥船屋中，以船隻言，推窗見雲龍頭先下垂，次掉尾雲端之外，全身躍躍分明，少頃尾及首先後收入雲中，仍一片浮雲，龍則不知歸於何往。先生嘆為奇觀，因作七絕一首以紀其事。（後並繪有雲龍圖一幅。）又作詠白鷺七絕一首。二十四日，至荊門州阻雨；有七律一首。二十五日，作舟行偶詠七絕二首。二十六日，作舟行即景七絕一首。二十七日，舟經安陸府；有七絕一首。二十八日，宜城聽鶯；有七絕一首。二十九日，經樊城，又過襄陽城；作七絕二首。三十日，次光化縣浦城鎮，午後灘河偶詠；各作七絕一首。

五月初三日，先生次光化縣審窩店，有七絕一首寫所見。初五日，由漢水入商河，因憶去年在都門端午遊煤山事，作七絕一首。初六日，灘行，舟經浙川廳境山峽中，午後舟過四合山；共作七絕四首。初七日，夜泊老營村；有七絕一首。八初日，又行山峽中；有七絕一首。晚泊浙川境東宇邨，小雨；作七律一首。初九日，抵荊子關，起旱；有七絕一首。十二日，有詠青石嶺七絕一首。十三日，坐篳子橋行商南道上，遇雨；有七絕一首。十七日，宿商州野邨店。時回變未幾，所經之地片瓦無存，感賦七絕一首。十八日，商州道上曉行，口占七絕二首。十九日，由商州抵黑龍峪口；有即景及詠黑龍峪口七絕各一首。二十日，過秦嶺謁昌黎伯韓公祠，晚宿藍橋訪韓湘子仙洞；各作七絕一首。二十一日，過藍田縣。城外野行時，遇一少年女子騎驢行路；因咏七絕一首。二十二日，進長安縣城，寓會館。曾謁見沈應奎，應奎慇懃邀飲，且出示其渡臺所作求木吟稿。安排四、五日後，復日奔夜行，過渭水，歇咸陽。

六月十六日，先生抵蘭州。旋至安定縣陝甘總督左宗棠大營呈繳部照，遂留營差遣。是月，宗棠搜捕甘南零匪淨盡。

七月十五日夜，先生於蘭州省城思家，作七絕二首：「記否家鄉獻敬樽，華筵葦素列當門；只今萬里為西客，空對孤燈拭淚痕。」「河魚甘米佐盤餐，地角天涯酒一樽；料想蘭陽今夜月，三更應照普孤魂。」是月，陝甘總督左宗棠進駐蘭州。

八月十五日夜，陝甘總督左宗棠集屬吏等於澄清閣，飲於和池上，賞月賦詩。先生與焉，且步宗棠韻有作云：「天留一餘地，恰好成三池。池中印明中，神將秋水為。引水黃河間，九曲來舒遲。澄懷清入抱，畢照妍嬋姿。環中空色相，象外涵圓規。靈沼與民同，水清且漣漪。無私臨下土，振古已如茲。明鏡上下開，宛似奉槃匱。仰觀消萬慮，俯察沁詩脾。化機流不息，坐照無盡期。一番新眼界，運會際於斯。重輪符瑞徵，好風俱與之。此池垂不朽，千載如一時。既加以美名，敬詠靈台詩。」

九月十五日夜，先生與黃畊翁（先生試院憶菊詩稱其負經濟才，又稱其文章羅滿腹。）考校院試試卷，首場閱畢後步月，有七絕一首抒感。是月，先生在貢院內尚有數教在寬、試院憶菊（二首）、佳士如香固可薰、安危須仗出羣才等詩作。

十二月十五日，蘭州府試，先生在貢院內閱卷，有冰橋七律擬作一首。

清穆宗同治十二年癸酉（一八七三），先生四十五歲。

四月初八日，先生偕同僚友遊五泉山野望。時山上原有之亭臺、樓閣俱遭回劫，尚未修建，唯剩遺址；而綠草成茵，山樹展腰，四望一條黃沙路，殘黎負戴耕樵於坡頭瘠土。後憶此遊有七律一首。

是月，先生奉委赴蘭州府發審局審錄。

五月初四日，先生憶家中二子，有詩云：「天涯地角極西車，宦海茫茫寄此躬；榆樹有錢空落葉，楊枝無力不勝風。山皆濯濯牛何牧？路盡迢迢馬易窮，明日端陽猶舊歲；遐思插艾兩兒童。」又有感遇一首云：「金城連塞亘西秦，胡地山川不見春；自嘆半生徒哺餒，偏來萬里學勞人。當場面目真還假，入世功名假作真；尚幸此身松柏性，風霜歷鍊倍精神。」先生抵甘後，屢欲將出門西行所經重洋之險、



平水之勝、車馬之勞，構一長篇以紀巔末，迄未下筆。十五日，在寓靜坐思家，遂成西行吟平仄七十一韻以自解。十七日，作詠蘭州城七律一首。三十日，作寓蘭垣偶詠七律一首。

六月初八日，先生省邸思家，作七律一首，有「鵲班散後閒無事，靜坐窗前想故居。」之句。初九日，有自嘆一首云：「壯志消磨未幾年，春催雙鬢半蒼然；炎涼不入三更夢，冷煖無常六月天。瘠地貧民荒野外，白沙黃草古城邊；儒生藉手將何策？莫使遺黎嘆飲羶。」十四日，作長相憶五律一首。

八月初七日，先生曉起思蘭陽親友，有七律一首。十五日晨，上院賀節，有感懷七律一首。二十五日，憶客夏由平涼過三關口，成七律一首。二十七日，作初秋感七律一首。是夜又作睡熱坑詩云：「暮雲西起日初殘，土坑熏煙繞畫欄；一枕漸生春夏氣，方牀翻作灶爐看。人來火上眠偏穩，雪滿窗前景不寒；方識此中無限意，也應酣睡到三竿。」二十八日，作地初凍及靠火爐七律各一首。二十九日，作深秋景七律一首。

九月初一日，先生居密洞，有七律一首。初五日，撥水冰，有七律一首。初七日夜，金城試雪，翌日憶而有作云：「疑煙疑霧又疑晴，釀就鵝毛試五更；幾點撒鹽寒夜色，頻來繞檻暗無聲。銀沙到曉看猶在，玉屑於今想不明，我到西來初詠雪，方知六出是真情。」初九日，作詠雪七律一首。十七日，重遊五泉山，有詩云：「又到五泉山上遊，東西龍口水悠悠；羣峰合抱開生面，兩澗分流入素秋。按轡徐行尋舊路，扶筇斜倚認前樓；豁然心目雙清候，身世何關任去留。」

是月，先生奉派充武闡差事。  
十一月，先生奉甘肅布政使崇檄署理蘭州府渭源縣印務。十四日抵任。

是年，噶瑪蘭廳自淡水廳分學，設噶瑪蘭廳學訓導。  
清穆宗同治十三年甲戌（一八七四），先生四十六歲。

四月十二日，先生在渭源官舍感賦一首：「初次操刀到首陽，山環南北擁花疆；地經劫後民猶少，天爲殘黎歲不荒。建樹無毫慚野蕨，

撫綏乏術愧甘棠；粉榆萬里迢迢遠，匏繫秦西作嫁娘。」

七月二十日，先生在官舍思家，託言作閨思三首：「寄語征人秋又秋，何因宦海任浮沉；回頭好作還鄉夢，莫似長江水自流。」「寄語征人秋又秋，寒衣製就向誰謀；勸君莫戀邊城柳，一夜經霜色已不。」「寄語征人秋又秋，誰教萬里覓封侯；知君夙有從龍志，際會風雲合出頭。」其間，有首陽懷古一首：「商家義士恥歸周，兄弟雙清扣馬頭；設使當年非餓死，首陽山下孰爲求？」

八月初七日，先生奉文修建倉廩，因赴五竹寺山上求木，有求木吟五律一首。

秋，與先生携手西行之堂弟某抱恙歸里。

十一月十四日，先生抵渭源署任週年，作七律一首。

十二月二十九日，先生曉起口占一首：「枉費還鄉夢，醒來嘆此身；祇因羈作令，萬里未歸人。」

是年十一月二十五日，先生友人進士楊士芳等稟請臺灣府知府周懋琦詳請上憲奏准興建明延平王鄭成功專祠。經層報欽差辦理臺灣等處海防兼理各國事務大臣沈葆楨等會銜上摺具奏。明年正月初十日奉旨准於臺灣府城建立專祠（即今臺南市開山路延平王祠），並予追諡曰忠節。

清德宗光緒元年乙亥（一八七五），先生四十七歲。

二月十五日，先生作感興一首：「渭城郊外萬山凌，二月河流尚結冰；瘦骨漸成秋後菊，客身常伴雨中燈。疎林落月空啼鳥，遠寺晨鐘獨老僧；撫字殘黎無別術，惟期百穀順時登。」十六日夜，憶家書久不至，賦詩一首：「歷觀往事鑒前車，出宰無忘志學初；驛馬只傳回去信，邊鴻不帶寄來書。莫嫌小邑難爲政，且勸災黎廣種鋤；百二秦關今夜月，應分餘照到吾廬。」十七日，作首陽即事詩云：「百里初膺到渭城，蓬蒿滿目嘆書生；頻招土客民千戶，且闢川坡地一成。善後窮官愁計歲，却餘遺老怕談兵；孤鴻未遂南賓願，月滿山衙夢五更。」十九日，作首陽春雨七律一首。又有憶去秋送堂弟抱恙歸里七律一首。



三月初七日，先生有感懷一首：「白髮催年老，如霜上鬢來；雪銷三月雨，春送一聲雷。小字欺花眼，荒庭長綠苔；何時隨雁影，掠水渡南臺。」

是月，甘肅布政使崇、按察使楊會同詳請陝甘總督左宗棠奏准以先生補慶陽府安化縣知縣。惟先生未赴任，仍在渭源署任。

四月初五日，先生祈雨，甘霖遂沛，有七律一首。三十日，雨後亦題七律一首。又有閒居有感七律一首。

十月十四日，作立冬後三日作七律一首。十五日，渭源士庶合獻先生以萬人衣。（相傳先生共有萬人衣五襲，今存二襲：一已捐藏臺灣省立博物館，一由文孫傳修珍藏。後者據陳漢光先生之記錄：「該物係錦織複衣，深藍色，甚寬大，胸腹前寫有『署甘肅蘭州府渭源縣事新補慶陽府安化縣正堂加五級紀錄五次李老父臺大人德政渭邑士庶等恭頌』，分五行排行並環以方型；背中心亦有『士仰龍門民無鴻噉澤流渭北聲訖江南』數字，分四行並環方型；此外，又有獻衣士庶姓名甚多，各環以圓型四五處。以上均用金字。」）先生賦詩爲答：「渭北家家選百錢，裁成一品獻青天；羞看白髮添新歲，竊喜烏紗戴老年。兩袖清風吹鶴氅，滿衣姓字落雲煙；歡呼父母堂中坐，長短隨身試一穿。」蓋渭源遭回變殘破，先生爲殘黎稟免攤派協餉，並請借給籽糧，流離之衆藉是安集，以故邑人德之。

十二月二十日，有旨可欽差辦理臺灣等處海防兼理各國事務大臣沈葆楨等請添設臺北一府三縣之奏，乃置臺北府，治艋舺，下設三縣：附郭一縣曰淡水，改淡水廳爲新竹縣，噶瑪蘭廳爲宜蘭縣；又改鷓籠名爲基隆，設通判，同轄於臺北府。

清德宗光緒二年丙子（一八七六），先生四十八歲。

三月，甘肅布政使崇、按察使楊會同詳請陝甘總督左宗棠由肅州大營奏准以先生陞補蘭州府河州知州。時先生猶在渭源署任，尚未赴安化實任，即有是擢，嘗自謂係左侯相格外栽培，不次擢用之故。先生仍未即赴河州任。

閏五月二十八日，先生於渭陽官舍作感懷詩云：「瞥眼紛紛勢利

場，孤身浪跡寄西疆；渺如一粟浮滄海，博得雙名入帝鄉。私下每懷歸故國，公餘却好讀文章；儒生自古多寒命，惆悵雲山萬里長。」

八月，先生奉陝甘總督左宗棠札，派充丙子科帶補甲子科內廉收掌官。二十一日，闕中遇雪，步內監試官顏聘卿韻作七絕八首，極獲聘卿許可。又詠七絕二首。差竣，先生仍奉令回渭源署任。

九月二十日，先生復以同治十一年八月十五日夜左宗棠譙集屬吏等於澄清閣飲和池原韻賦詩云：「城外黃河水，院上飲和池。問是何代鑿？答云宮保爲。宮保度隴來，不速亦不遲。決策擒逆逆，裘帶松鶴姿。左仗西征鉞，貔貅凜營規。因思利用汲，疏鑿引漣漪。殘黎欣食德，心鑒日在茲。老者扶杖觀，少者奉槃匱。況當三五夜，俯仰清心脾。一觴復一詠，志與亘古期。我來自海外，萬里官於斯。幸際肅清日，衣裳楚楚之。但願此三池，中秋明月時。年年我公賞，持節以賦詩。」

十二月初旬，渭陽縣訓導魏克卿及典史冒麗川均以詩自矜，互相唱和，並錄而索和於先生。先生因題七絕一首以應之，二人竟不復作矣。

是年，宜蘭縣興建儒學。先生與友人進士楊士芳、邑紳黃鑄（字佩卿。道光三十年恩貢。）等倡修文廟大成殿、東西兩廡及崇聖祠。清德宗光緒三年丁丑（一八七七），先生四十九歲。

二月，先生奉甘肅布政使崇檄，赴河州知州任。河州爲回漢雜處之區，易滋反側。先生蒞任後，勤政愛民，稟請減折丁錢，及更正倉用斛斗，民心以靖。先生之爲政，不事姑息，然居心慈厚，故罹法者亦知感泣。又州甫經兵燹之後，文教歇絕，先生興學養士，文風大有起色。

先生抵河州任後，與學正馬宗戴（字小唐；甘肅寧遠人。咸豐八年舉人。光緒元年任河州學正，深得士子心。）朝夕過從，相交最契。每促談唱和，兩忘形跡。

八月十五日夜，先生在官廨拜月，口占五絕一首：「拜月初更後，思家萬里餘；可憐天上鏡，空照雁來書。」中秋後，甘肅布政使司



照磨潘文鏡（號蓉江；四川人。舉人。在任數年，與先生素交好。）六旬壽日，一家聚首慶祝。旋寄壽詩七絕二首索和於先生，先生因以公餘和之。

九月初九日，幕友李瀛濤同諸友赴吏目劉蔣樓署中飲酒賞菊，作七律三首，索和於先生，先生諾而和之。嗣又以前韻作三首。二十七日，學正馬宗戴題先生西行吟草詩二章，（馬裕藩曾步其韻作二首呈先生：「集成一品仗仙才，意蕊心花到處開；力挽狂瀾持以正，獨留真味美於回。吟懷別寄風塵外，好句都從閱歷來；我亦雕蟲慚小技，幸瞻藜杖仰丰裁。」）「不矜雕琢與傳神，小製驚花亦性真；自昔宏才驚倚馬，於今大雅可扶輪。依劉幸遂平生願，御李情同骨肉親；聞說雲龍曾目睹，天開奇境予詩人。」宗戴別有題西行吟草詩讚一首：「卓爾能扶大雅輪，三年作宦守清貧。（原註：公宰渭源數載，不名一錢。）身經險阻吟懷壯，（原註：常談閩中海船光景，風波險阻。）交在文章氣味親。到處競談循吏傳，好官端是讀書人。（原註：前宰渭源，頗有政聲。）一編詩稿千秋業，惟我知君面目真。六科簽領手親裁，不是尋常百里才。此志未甘隨俗去，一官辛苦讀書來。記遊詩草重刪訂，垂老心花更怒開。怪底吟懷偏矯健，木蘭舟上看龍回。（原註：公在漢江船上，親見天外掛龍，繪有雲龍圖一幅，紀之以詩。）」先生因答詩二首：「老手工夫著斷輪，順時循分不言貧；（原註：余自履任枹罕，迄今半載有餘，未聞先生言及學中清苦，令人欽佩。）世居秦隴家風舊，（原註：先生籍隴甯遠縣，係鞏秦階道所屬。）鐸振河州士氣親。（原註：先生司鐸枹罕，深得士子之心。）吟到窮時何似我，（原註：先生和李瀛濤重陽飲酒賞菊詩，中有「人到窮時氣倍雄」之句，與余暗合。）得一奇語便驚人。於今始見廬山面，面目原來肖性真。」「數首新詩合體裁，知君自是不凡才；昔年也共登雲去，（原註：先生與余戊午科鄉榜同年。）老到同歸此地來。（原註：余牧枹罕時，而先生早已司鐸此間，有不期遇而遇者焉。）心藥每從空處結，筆花好向夢中開；（原註：先生題余西行吟草詩二首，足見學養兼到。）陽春贈我難爲和，一字推敲費幾回。」二十八日

，公出抵寧河，作詩云：「枹罕操刀數月時，催科政拙長官知；因嫌州署多塵事，來到寧河爲作詩。半面山城含落照，一灣秋水凍寒漪；匏瓜一繫歸何日，徒嘆南飛雁影遲。」

十月十八日夜，先生憶家中二子，賦詩云：「謬膺民牧擁專城，案牘勞勞夢五更；背榻殘燈光不遠，挂窗斜月影微明。容身之外皆餘地，得意其中便自鳴；曷若投簪歸竹里，兒童伴我讀書聲。」十九日夜，臥聽更鼓，感賦七律一首。

清德宗光緒四年戊寅（一八七八），先生五十歲。

五月初六日，甘肅布政使司照磨潘文鏡郵寄喜雨詩二章相示，先生有和作。二十三日，早飯思家，作七律一首。

八月十五日夜，拜月，作七絕一首。

九月二十三日，先生避壽郊外大拱北寺賞菊，作七律及五古各一首。夜宿城西玉皇上帝殿山房小樓。二十四日，仍居山房小樓，有七律一首。幕友李瀛濤贈先生壽詩二章，先生有和作。二十八日，吏目劉蔣樓贈先生數種秋菊，先生喜甚，題五古一首爲謝。

是月，先生因感官場人情巨測，甚惡之，遂有告退之想。

清德宗光緒五年己卯（一八七九），先生五十一歲。

四月，先生遭惡意中傷解任，旁觀者代爲不平，先生坦然自若，毫不介懷，謂學正馬宗戴曰：「宦海升沉，有何一定？仕途況味，不過如斯。余去官亦最樂，惟與君三載知交，又復分袂，未免拳拳於心耳。」言之黯然，宗戴亦愴惻而退。十二日，先生卸河州知州篆，感懷寄宗戴七律一首：「八年辛苦慕虛名，悞入迷途嘆此生；世路馳驅多險阻，廬山面目不逢迎。知音且喜來鍾子，好古還須學老彭；一日仔肩卸後，好歸竹里續前盟。」

五月十四日，作卸篆後閒居七律一首。十七日，作河城有感七律一首。十九日，作枹罕官舍別菊七律一首。

是月，河州學正馬宗戴於學舍之聽雨軒爲先生之西行吟草撰序，有云：「李君靜齋，余同年友也，以閩東耆宿，捧檄來甘，凡行跡之所閱歷，耳目之所見聞，舟中得句，馬上構思，因物感興，得詩若干



首，名之曰西行吟草，亦紀遊意也。溯自癸酉冬署渭源縣，請補安化，丙子歲由安化升補河州，丁丑春到任，與余交莫逆。公餘之暇，常以詩章相唱和，因取西行吟草示余讀。余愛其醞釀含蓄，別裁偽體，能得唐人三昧，以視矜才鬥捷、雕琢於字句之間者，蓋不啻霄壤矣。既而徐觀其爲政，事無大小，皆以實心實意行，不尚粉飾，不求聞譽，適如其人，亦適如其詩。袁簡齋謂：從古詩人多爲循吏，殆信然歟！己卯夏，先生請咨引見，卸篆閒居。余蹈暇相過談，并求西行草而熟讀之，因勸付剞劂以公同好，而先生自視欲然，若有不肯自銜之意；余曰：文藝後於器識，先生循聲卓著，固不必以詩傳，然就詩而論，余決其必不脛而走矣。況先生八年於外，兩袖清風，歸裝蕭澹，所得者只詩集一卷耳，是又何可使之湮沒乎？先生似首肯之，因贅數言於卷首。他日携鶴重來，以爲後緣，並以誌嗜癖之癖，彼此有同情也。」

六月初二日早，先生發河州進省。時，城關百姓祖道換靴，俱各垂淚；道上紳商以酒餞行，先生各一飲而乾，不覺大醉。有七律一首，中有「三載爲官囊尚澁，一編吟草手重刪」之句。

清德宗光緒六年庚辰（一八八〇），先生五十二歲。

二月初八日，先生有晨起感懷七律二首及午後假寐聞雷偶詠七律一首。時先生寓鐵柱宮傍小院，每日早起擁坐床上，多吹水煙，習爲常例。初九日，陝甘總督左宗棠祭丁，四更時先生隨班趨詣文廟觀祭，作七律一首。夜作偶詠七律一首。十一日，有曉起寫懷七律二首。十二日，有漫興七律一首。

三月初七日，甘肅布政使司照磨潘文鏡邀先生及劉翰臣、續紹庭、葛鼎卿等共九人赴城西上帝廟最高之處黎花館修禊，飲酒賦詩。先生因赴他筵，故未參加。文鏡及翰臣等八人皆至，以「羣賢畢至少長咸集」八字分韻，各抒所見，以紀一時盛事。後先生過文鏡署，讀諸人所作，即原韻八字，各成七律一章以示文鏡。三十日，文鏡復邀先生及紹庭、翰臣、懋佩雲、徐海峰等人赴城東雁灘張家花園飲酒賞牡丹，分韻，先生得紅字，作七律二首。先生又有恭次欽憲石泉楊大人

（昌濬）薇垣賞牡丹元韻云：「我公杖策自南來，恰好名花兩度開；（原註：公於光緒四年冬奉旨來甘幫辦新疆善後事宜，容秋欽賜三品頂戴兼署藩司印務，今春又蒙恩旨賞賜頂戴。）」豔奪唐宮成畫錦，（原註：藩署內有畫錦亭。）香分吳苑到春臺。風流獨擅無雙譽，富貴當推第一才；料想牡丹亭下客，相看應醉酒千杯。」

四月初六日，先生與潘文鏡約會同遊五泉山，適因他事所牽不果。初七日，先生乃乘興獨往，作竹枝詞四章。

六月，先生奉署甘肅布政使楊昌濬檄委，調署狄道州知州。

八月初二日，先生就狄道州知州署任。

十一月，詔命陝甘總督左宗棠入覲，署布政使楊昌濬護理陝甘總督。

是年，先生於狄道州見明楊忠愍公（繼盛）所建椒山書院，繼又讀其全集，不勝焚香想慕之至。

清德宗光緒七年辛巳（一八八一），先生五十三歲。

正月，陝甘總督左宗棠入覲，詔命管理兵部事務，在軍機大臣上行走，並在總理各國事務衙門行走。

二月初一日，護理陝甘總督楊昌濬卸護，曾國荃任陝甘總督。

三月，先生奉檄撤委署狄道州知州，卸事後進省聽差。狄邑士民又送先生以萬人衣，並獻萬家生佛匾額一方懸掛大堂上，而同聲怨布政使司之撤委。

八月二十三日，陝甘總督曾國荃病免，譚鍾麟繼任。是月，楊昌濬實授甘肅布政使。

九月初六日，兩江總督劉坤一罷，左宗棠繼任。十六日，先生步護理陝甘總督楊昌濬重陽菊花生日詩十首原韻云：「菊花生日公生日，嶽降生申合賦詩；天爲我公留晚節，此間不與俗人知。（原註：元唱每章首句俱以「菊花生日我生日」起，主意在此，當仍以此句爲題近是。）」「菊花生日公生日，最是長生結伴時；始覺前身原是佛，家家花獻大慈悲。」「菊花生日公生日，駐節金城慶有年；開到黃花稱一品，高枝雅麗最堪憐。」「菊花生日公生日，公比此花質更優；



隴上風霜無限冷，運籌帷幄不防秋。」「菊花生日公生日，賞菊吟詩吟一囊；歷盡繁華標勁節，清高品格貴當王。」「菊花生日公生日，占得秋光自發榮；且喜花開添壽福，知心不獨一淵明。」「菊花生日公生日，名花相得共徘徊；因知國老今朝壽，故向堂前着意開。」「菊花生日公生日，杖策西來過漢陽；今日看花仁壽境，枝枝開放滿天香。」（原註：督署前蒙慈禧皇太后御筆仁壽二字金匾懸大堂上。）「菊花生日公生日，籌邊策國老彌勤；園丁報道今年菊，香華滿堂已十分。」「菊花生日公生日，願采芳花預釀醅；以待來年重九日，稱觴呼祝醉千杯。」

十二月二十六日，先生省邸思家，有詩云：「棒檄西來忽十年，離愁萬斛似寒泉；誰將爆竹迎新歲，未許椒花頌鎮邊。」（原註：河州舊有鎮邊樓。）倦客思歸心過海，（原註：余家住臺灣。）狂吟得句意通天；吾儒窮達皆由命，肯學逢迎負聖賢。」又作感遇思友詩云：「功名勢利淡浮雲，得喪原從命裡來；悔舍天倫真樂事，強來宦海逐塵氛。風波意外人難料，冷煖場中耳厭聞；十載爲官渾似夢，何時重與細論文。」二十九日，有除日遺悶、除日又吟、除夕思家各七律一首。

是年，先生次子先甲授室。

清德宗光緒八年壬午（一八八二），先生五十四歲。

二月十八日，先生有咏五泉山東龍口（爲蘭州第一名勝之區）及西龍口七律各一首。

四月初三日，先生讀史，有詩云：「春秋絕筆獲麟時，歷代興亡讀史知；不是考亭持定論，賢奸忠佞到今疑。」

五月初九日，先生遊蓮花池（有蘭州小西湖之稱），有七律一首。十五日夜思家，作七律一首，又作偶咏七律一首。十六日，憶故園，有詩：「故園花柳逐春榮，乘興閒行聽曉鶯；何意今成秦隴客，年年遙憶舊詩盟。」十七日，有感懷詩云：「委身作吏十來年，一事無成兩鬢鬚；欲爲殘黎除敝政，敢因覆餗怨蒼天。狂吟尚未詩三百，歸去還多路八千；每羨蘭陽高隱士，琴棋風月自神仙。」十八日，早起偶

咏云：「清晨早起獨徘徊，曙色曦光映鏡台；閒興漸將詩興引，衰顏還帶笑顏開。竹簾自動知風至，瓦鵲驚飛識客來；我是瀛東庸俗子，無緣安得到蓬萊。」十九日，飯後偶吟七律一首，有「儘日光陰無所事，閒敲棋子到燈殘」之句。又有省邸晚閒及自參透各七律一首。二十一日夜，聽胡少君彈三絃，有七律一首紀之。二十二日，重遊蓮花池，有七律一首，又題張山人別墅詩云：「小西湖畔屋三間，一面黃河一面山；庭樹有花空自笑，草堂無客盡常關。風吹過處渾忘夏，鳥倦飛時竟自還；爲問山翁何快意，只因知足便心閒。」二十三日，至五泉山酒仙殿避暑，訪住持未遇，口占七絕及七律各一首。二十四日，到雷壇訪道避暑，七律一首。二十五日，偕王石甫、劉星曹、張九如等到酒仙殿消暑，有詩云：「酒仙殿上足清幽，樓閣生風快夏遊；身世去來原是夢，衣冠束縛又成囚。諸君且喜忘形迹，我輩何須泥應酬；今日江山同一覽，（原註：山上武侯祠有一覽樓。）蘭州佳氣望中收。」二十六日，以七律一首約王石甫等再到五泉山消暑。二十七日，遂偕石甫、星曹等人在雲溪樓飲酒消暑，有七律一首。二十八日，仍在雲溪樓消暑，有七律一首。是夜思家，有七絕一首。又作擬遊白塔山登樓遠望七律一首。時先生寓四府巷內，巷中多暑氣，故每需消夏避暑。

清德宗光緒九年癸未（一八八三），先生五十五歲。

四月十五日，先生重到河州，感賦七律一首。

六月中浣，先生移寓鐵柱宮東廂，庭階潔淨，頗爲快慰。

七月二十一日，先生又到河州，有七律一首。

八月初三日，先生復因事赴河州，返道出狄道州，謁署知川龍杏生（杏生當係字號之類，非其本名；湖南湘鄉人，篤志力行，卓然廉吏。）談心數日，頗稱知心。杏生因出所著芙蓉觀爽軒詩鈔二卷相示，先生讀而愛之，作七律一首寄贈之。其時杏生請魏午莊等籌款重建椒山書院，先生聞而喜之；後有詠狄邑椒山書院詩併序之作，詩係七律一首。初九日，由狄道回省，曉過摩雲嶺，有七律一首。十五日，有詠狄城形勝七律一首。十六日，作七律一首寄狄道州洮陽書院山



長張鳳山。十七日，憶七年三月別狄道州，口占七絕一首。二十九日，謁重修忠愍楊公祠，有七律一首。

九月初三日，先生有詠河城形勝七律一首。夜作寫懷七律一首。初九日，同司馬吳鶴林（江西人）、通守曾子雲、刺史馮柱初、惟一亭愍佩雲明府、方少修、方雲甫、朱小唐諸人到五泉山雲溪閣登高宴集，有七律一首。

十月初四日，署狄道州知州龍杏生和先生詩一章，先生仍答之以詩云：「三復新詩句欲仙，奚堪過譽愧當年；彼時未必全忘怨，別後猶虞罵要錢。頭上鑒觀應不爽，人間輿論總無偏；知君到處裁棠蔭，來莫興歌化雨天。」

是月，吳鶴林題先生及署狄道州知州龍杏生先生七律一首，以先生及杏生先後權握狄篆，方之召父杜母。先生謂杏生固新政可觀，自謙前蒞狄毫無及民之政，讀之汗顏，作七律一首答之。又有次韻和魏林元唱七律一首。

十一月十六日張子餘將啓行出關，赴張老師行營投効。先期，吳鶴林、愍佩雲諸人作詩送之。十四日，先生亦就原韻作七律一首，以爲惜別。

清光緒十年甲申（一八八四），先生五十六歲。

三月初九日，先生有蘭州清明日感詠云：「清明祭掃各紛然，燒紙灰飛蝶滿天；千古賢愚可白骨，一生名利化黃泉。斷腸少婦新墳外，痛哭征夫舊塚邊；物理細推皆有盡，也應歸去樂餘年。」

四月初八日，先生有詠五泉山浴佛會七律二首。

是月，詔集廷議對法和戰事。命嚴戒海防、署直隸總督兼理通商大臣李鴻章出海巡閱。先是，九年七月二十一日，法人以兵力迫脅安南訂順化條約，以安南爲保護國，法使驅黑旗軍。八月初三日，黑旗軍劉永福與法軍激戰於丹鳳。十一月十七日，法提督孤拔攻佔山西。本年二月二十九日，法軍陷太原、北寧，廣西巡撫徐延旭及雲南巡撫唐炯並革逮，分別以潘鼎新及張凱嵩繼署。

五月二十六日，繼三月十八日法艦一艘入基隆瞭望繪圖、強行購

煤之後，續有法艦一艘窺基隆。

閏五月初四日，詔：前直隸陸路提督劉銘傳着賞給巡撫銜，督辦臺灣軍務。二十五日，法艦再窺基隆。

六月初三日，先生過泉蘭縣署，李問樵出示其所購獲楊忠愍公（繼盛）劾仇鸞、嚴嵩二疏墨跡稿，因題詩一章併序，詩云：「身騎箕尾下曹郎，二疏爭分日月光；正氣明明扶社稷，丹心朗朗照穹蒼。河山血染千秋碧，翰墨香流百世芳；凜凜冰霜誰得似，孤忠端不讓天祥。」

是月初一日，法艦巡泊基隆。十四日，續有法艦四艘直逼基隆，且向我守軍將領提最後通牒。十五日，法艦擊毀基隆礮臺。十六日，法軍登陸，我守軍力戰却之，法軍傷亡百餘人。

七月初五日，先生閱邸抄，知馬尾、基隆有警，作詩云：「海外音書斷幾年，南天又報起烽煙；彼蒼偏仰英雄志，吾道難期遇合緣。北斗七星光漸動，東瀛一島勢孤懸；自來中外皆違約，何意西人啓衅先。」二十八日，先生有金城感遇五古一首。其間，又有候補官風味七律一首。

是月初五日，因中法戰端已開，有旨電令沿海各省督撫：見有法船進口，立即轟擊，毋稍遲回，致落後着。初六日，明諭對法宣戰，授劉永福記名提督，命迅圖恢復越南失地。初旬起，法艦困擾臺灣基隆、滬尾等地，臺灣信息不通。

八月，先生以法人侵擾臺灣，十四日基隆失守，爰稟請陝甘總督譚鍾麟准給假出省渡臺。

九月，初旬先生作歸山雜詠七絕十首。十六日，有別金城詩云：「朝辭玉塞出金城，百二秦關此日程；一十年來勞意馬，八千里外駐心旌。場中傀儡場中散，隴上風霜隴上行；世事多艱堪扼腕，海天烽火幾時清。」

是月初五日，法軍宣布封鎖臺灣。二十六日，法軍進犯獅球嶺鳥嘴峰山隘，我守軍負壘力戰三晝夜，却之。二十八日，法艦四艘擾臺南。時，臺局甚危，幾不堪設想。



十月二十四日，先生出蘭州；有出金城偶咏及又咏各五律一首。時先生囊無別物，唯携西行吟草稿底兩本而已。二十六日，經車道嶺；有咏銅手鑪七絕一首。

是月，法軍復三犯鳥嘴峰，皆不得逞。

十一月初六日，先生過涇州坡，晚宿高家窰小店；有詩云：「涇州坡上是平原，萬頃乾田擁老村；一路車塵傷病眼，數間土屋半開門。湖山到處雖容我，君父思來未報恩；本亦澄清同有志，雖知攬轡嘆還轅。」二十一日，經河南陝州境，沿途皆雪。午過三老郡；有七律一首。二十二日晚宿廟溝，四山雪深尺許；作五律一首。二十四日，宿鐵門鎮。二十五日，午過函谷關；有五律一首。晚，宿洛陽城；有五律一首。二十七日，夜五更自承恩鎮楊家店早行；途中有五律一首。二十九日，宿新鄉縣大家店，早行；作五律一首。

是月二十五日，法軍自獅球嶺等地四路環攻我軍，血戰至暮，法軍死傷百餘人。二十六日，砲戰，法軍遂不敢進。

十二月初一日，先生出衛輝府，午抵淇縣；有五律一首。淇縣南門外有殷代六七賢聖君古墓道碑，先生因行色匆匆，未暇拜謁墓祠，作五律一首弔古焉。初二日，曉渡漳河，過河北磁州；有五律一首。初四日，邯鄲早行；有五律一首。初五日，沙河縣道上作五律一首。初六日，宿柏鄉縣，苦寒；有五律一首。初七日，由樂城縣，午經正定府南門，見漢順平侯趙雲故里碑；及至北門又見南粵王趙佗故里碑，感懷作五律一首。初九日，曉過望都縣，抵保定府，途遇大風沙，作五律一首。十二日，宿於距京都永定門三十里之黃村子客店，作感遇七律一首。三十日，寓京都永定門外韓家館（即漳州外館），除夕感遇作七律一首。

是年，臺南培元總局復改爲團練總局，按察使銜分巡臺灣兵備道劉敬手定章程十七條公布之。既又刊漁團章程二十條，通飭紳民暨沿海漁戶遵行。設全臺籌防總局，一在臺北府治，一在臺南府治。設運轉局於上海。

清德宗光緒十一年乙酉（一八八五），先生五十七歲。

正月初一日，先生有乙酉都門元旦偶咏七律一首。初二日，至廣德樓聽四喜演八仙過海劇；有七絕一首。二十六日，宿天津紫竹林；有七律一首。二十八日，出大沽口；有七律一首。

二月初三日，先生在上海，鄉友林渭川邀赴茶館聽彈唱；有七律一首。初六日，有上洋偶咏云：「滬江風景歲加新，南北商輪往返頻；星火萬家天不夜，洋車一路地無塵。紅樓處處吹橫笛，茶館時時有美人；最是十方魔世界，當前切勿誤迷津。」二十五日，先生抵福建南臺，寓中亭街蔡順源店，時中法和議未定，先生渡臺無計，有感賦詩云：「聞警單車塞外來，風霜歷盡到南臺；誰知一水成千里，竊恐求魚有後災。精衛未啣填海石，作舟終乏巨川材；中亭街上思鄉夜，夢裡湖山看幾回。」

是月十三日，法將孤拔率艦南攻澎湖。十五日，澎湖各島全陷。尋，中法和議成立。二十一日，宣布停戰撤兵。

三月初六日，先生仍寓南臺中亭街，有詩云：「塞上歸來冬復春，沿江烽火問閩津；三貂時入南臺夢，五虎欣逢北海人。悶伴孤燈過雨夜，閒敲佳句送花神；盤餐縱足魚蝦味，蘭水蘭山目未親。」

是月初二日，法軍解除臺灣封鎖。二十七日，中法天津條約成。四月，先生返抵家門，天倫重敘，悲喜交集。旋，先生奉福建巡撫劉銘傳委辦宜蘭團練，並權主講仰山書院。

五月初六日，法軍交還基隆。初九日，法軍全調往澎湖。

六月十二日，法軍離澎湖。

時，海防解嚴，先生本應回甘銷假，因復奉福建巡撫劉銘傳劄飭辦理善後勸捐、清賦等事，乃稟請銘傳奏請准予開去河州知州實缺。銘傳據稟具奏，有云：「臣查宜蘭縣僻處後山，番民雜處，匪盜甚多，善後一切亟須得力官紳會同舉辦。李望洋素有鄉望，情形熟悉，以之辦理宜蘭縣團練、善後等事，實於地方有裨。合無仰懇天恩，將甘肅蘭州府河州知州李望洋開去河州知州實缺，留於本籍辦理團練，以期保衛地方。」月之二十三日，軍機大臣奉旨：著照所請，該部知道。尋，吏部覆奏，有云：「應遵旨將甘肅河州知州李望洋開去河州實



缺，留於本籍辦理團練。再查甘肅河州知州係調要缺，應由該督照例辦理。惟甘肅仍係軍務省分，相應奏明請旨，飭下福建巡撫，俾該員差竣，即行飭赴甘肅原省坐補原缺，以杜規避。」七月二十日，奉旨：「依議。欽此。」十一月，本案部文始由署宜蘭縣知縣林鳳章照會先生知照。

是年，先生增張鏡光（字恆如；邑人。）以案首入學。

清德宗光緒十二年丙戌（一八八六），先生五十八歲。

四月初八日，先生作寄老來花云：「卿昔鏡中花，我今雲上鶴。

雲鶴自清高，殘花人輕薄。寄語老來花，莫被風吹落。」

五月初七日，先生作宜蘭集詠八首云：「張弓形勢是宜蘭，萬疊高山擁長官；生面別開東海角，龜峰聳峙似彈丸。（蘭陽形勢）」「玉山高並歲常寒，秋水澄清一色看；七十餘年歸治化，番黎今亦整衣冠。（民番集處）」「版籍圖收七十年，萬家烽火戴堯天；菁華自是隨時發，文運何曾限海邊。（文風日上）」「萬山屏障竹圍城，欽枕時聞海浪聲；報道春帆歸石港，人人爭看弄潮旌。（貨船入口）」「西山爽氣入斜陽，城市人來個個忙；買得米魚歸去後，三餐無餒傲羲皇。（鄉多魚米）」「潮來汐去萬千遭，巨浪翻空撼石礁；爲問靈胥何抱恨，激成東海怒波濤。（北關海潮）」「龜蒙聳翠鎖中流，萬頃煙波濯素秋；天爲我蘭開半面，好觀海日滾金毬。（龜山曉日）」「五岳歸來又看山，三貂一路透重關；誰知海角成源洞，別有桃花不改源。（境比桃源）」

六月十七日，先生作寄吾廬云：「解組歸來瞬歲餘，宜蘭城北寄吾廬；時邀明月爲知己，幸有清風不棄余。朋輩喜逢今日面，閒中補讀少年書；茫茫世局誰能識？人事滄桑迭乘除。」此首爲西行吟草全書殿後之詩。

是年，署宜蘭縣知縣林鳳章詳請臺灣巡撫劉銘傳批准諭委先生在局會辦清丈對單各事宜。

清德宗光緒十三年丁亥（一八八七），先生五十九歲。

十一月，先生以時值盡根圳價銀七百五十大元，承買柯接枝、柯

順茂等祖遺宜蘭東勢榕樹門龍目井順安莊水圳一道，（噶瑪蘭廳志卷二上規制水利順安莊圳條云：「在廳治二十一里。寬二丈或丈餘不一，長一千五百餘丈。其源在鹿埔龍目井，沸泉四散，匯流成溝。居民因自井引入順安、打那美、四十份，至貓里甫烟、珍珠里簡諸莊，灌田約三百餘甲。每逢修理，民自鳩資。」）連溪頭、埔地、泉濕及陡門、圳道（年收早、晚季水租穀二百石左右），及餘埔、曠地等。（據杜賣盡根水圳字，原件作三年十一月，因三年先生尚未返臺，本篇逕改爲本年事。）

清德宗光緒十四年戊子（一八八八），先生六十歲。

清德宗光緒十五年己丑（一八八九），先生六十一歲。

十月，先生爲修蘭西李氏族譜，撰臺北宜蘭始祖振庚公譜引及自敘家言。後者有云：「迴憶自出宰迄還鄉，始終一十四年中，宦海茫茫，風波叵測，受幾多折磨，經幾多盤錯，自問身非鐵漢，其何以堪此熬煎乎！官場況味，概如斯也。以故急流勇退，而棲遲衡門下以樂餘年焉，足矣！今者年六十一，筋力雖云尚健，然爲子孫計，不得不將一生顛末略敘大概以貽後人，俾有志者讀此奮袂而興焉。是則余自敘之本心也夫。」

是年，先生仍在局會辦清丈對單事宜，並曾稟呈出身及履歷。

清德宗光緒十六年庚寅（一八九〇），先生六十二歲。

正、二月間，先生領銜具稟署宜蘭縣知縣沈繼曾詳報福建臺灣巡撫劉銘傳，略謂：「劉朝帶督軍開路，傳德柯帶隊勦番，並屬忠勇性成，不避艱險，爲民捍患，功德難忘，懇請奏建專祠，用伸報享。」按宜蘭防軍統帶副將劉朝帶上年九月進山開路，於光立嶺附近中伏陣亡；傳德柯即接統該軍者，本年二月會同各軍勦辦南澳番社，又復力戰陣亡。是先生等有是舉。閏二月初七日，銘傳據報在臺北附片具奏請在宜蘭縣建朝帶、德柯專祠。三月十七日，奉硃批：「着照所請，該部知道。欽此。」八月，戶部咨銘傳，有云：「至建造專祠所需款項，是否由該紳民自行捐辦？原奏未據詳敘明，應令查明聲覆；並俟專祠落成後，將動支祭品銀兩，即行專咨報部覆辦可也。」銘傳乃層札



查明聲覆。

多，先生遵札稟覆署札遵宜蘭縣知縣沈繼曾，有云：「茲蒙諭飭洋等迅即妥議劉故副將等專祠，究應如何籌款建造之處，尅日妥議明白，稟覆赴縣，以憑詳辦各等因。奉此，洋等遵即邀集公所，悉心籌議。僉謂此係美舉，固應由本地紳民題捐辦理；奈因去歲晚季雨水連綿，田稻收成減半；本年早季復歉獲，兼之夏、秋間陰雨過多，城鄉百姓十分憔悴。若欲就地捐建，實在萬難；況宜邑僻處海隅，地方瘠苦，再無別款可籌。心想無計，惟有懇准轉詳，體卹民情艱苦，實在難於集捐；可否由上憲發款建造？出自恩便。」經詳奉福建臺灣巡撫劉銘傳批示：「據詳已悉。仰布政司移會善後局查核，能否籌款興建？如該局無款可籌，即稍遲時日再議；仍先具覆飭遵繳。」

是年，先生編修蘭西李氏族譜（家傳附）竣事。

相傳是年先生於宜蘭倡建新民堂，為臺灣有鸞堂之始。（一云光緒十四年，臺南佳里震興宮已有鸞務。）

清德宗光緒十七年辛卯（一八九一），先生六十三歲。

是年，先生四子先麟（學名登科）生。側室張氏春花娘所出。

清德宗光緒十八年壬辰（一八九二），先生六十四歲。

清德宗光緒十九年癸巳（一八九三），先生六十五歲。

清德宗光緒二十年甲午（一八九四），先生六十六歲。

清德宗光緒二十一年乙未（一八九五），先生六十七歲。

三月二十三日，中、日簽訂割臺之馬關條約，約之第五條規定：本約批准互換兩年內，讓與地方之人民願遷居他處者，得任便變賣所有產業退去界外；凡限滿後尚未遷徙者視為日本臣民；並定本約批准互換後，兩國立即各派大員至臺灣，限兩個月內交接清楚等語。事聞，全國譁然。

四月十四日，馬關條約於煙台換的。

五月初二日，「臺灣民主國」成立。初六日，日軍自澳底登陸。

初十日夜，割臺專使李經方於基隆口外，就日艦與樺山資紀簽署臺灣交接文據清單。十一日，日軍陷基隆。十六日，日軍入臺北。二十八

日，日軍岩崎少佐率步兵二中隊偕日本宜蘭支廳長河野主一郎，乘八重山艦自基隆趨佔蘭陽一帶。二十九日，十一時日軍自蘇澳登陸。三十日（一作二十九日），日軍侵入宜蘭縣城，知縣汪應泰避居紅水溝民家，被迫辦理移交。自蘇澳及羅東相繼陷後，盜匪遍地，蘭陽地區秩序大亂，邑人不得已推先生及生員陳以德與日軍洽商保護桑梓之安寧。（先生頗以此為人誹議，如洪棄生先生撰寄鶴齋詩話至謂：「夫日本之陷臺，臺民之冤酷，自有兆衆口碑在，無事多贅。至於撫軍棄臺，敵人上岸，臺北、宜蘭、新竹紳士如楊士芳、李望洋輩望風送款，誠狗彘之不若！」）

是月至六月上旬，義軍數與日軍奮戰，曾反攻新竹，殲敵騎於大湖口。幫辦軍務劉永福遣吳彭年率黑旗軍北援，與日軍相持於新竹以南月餘。六月中旬，日軍大舉進犯，一部繼續南下，一部循海路自南部之枋寮登陸，一部由西部之布袋嘴登陸，三路齊指臺南。二十三日，苗栗不守。七月初七日，臺灣府繼陷。初九日，彰化陷。十四日，日軍犯他里霧、雲林等處。八月十九日，雲林陷。二十一日，嘉義陷，臺南震動。二十七、二十八兩日，打狗、鳳山連失，臺南陷重圍。九月初三日，日軍入臺南，越日日海軍入安平港。

是年，日人肆意殺戮，邑人苦之，先生增張鏡光作開生路論（收入宜蘭縣志卷七藝文志文學篇）以諷之。後，宜蘭支廳長河野、守備隊長兒玉等感動，乃設教民局，施懷柔，以平鳩勢吉主其事，全活甚衆。（鏡光後一度為日人所囚，商人罷市營救，終獲釋放。鏡光曾任仰山書院講席，致力教育工作垂六十載，卒年七十有九，執紼者數千人。）

是年，日人將臺灣地方行政機關設臺北、臺灣、臺南三縣及澎湖、基隆、宜蘭、新竹四支廳。

清德宗光緒二十二年丙申（一八九六），先生六十八歲。

九月，日人以府令頒布臺灣紳章條規及細則與諭告文，後者有云：「為表彰島民中具有學識資望者，茲特訂定紳章條規。」（紳章之頒發為日人據臺初一種籠絡留臺遺老及士大夫階級之手段。）



是年，先生受日人聘任宜蘭支廳參事，先生友人進士楊士芳亦然。先生應席前諮詢，屢有獻替可否；蓋先生關心時事，罔有少懈也。清德宗光緒二十三年丁酉（一八九七），先生六十九歲。

正月十一日，北臺地區發生強烈地震，震源在宜蘭。此次地震為自同治七年以來最強烈者。

三月，日人授佩先生以紳章。

是年，日人改設臺灣地方行政機關，共置臺北、臺南、臺中、新竹、嘉義、鳳山等六縣及澎湖、宜蘭、臺東三廳。

清德宗光緒二十四年戊戌（一八九八），先生七十歲。

五月初二日，日人再改臺灣地方制度，置臺北、臺中、臺南三縣，及宜蘭、臺東、澎湖三廳。

清德宗光緒二十五年己亥（一八九九），先生七十一歲。

三月，先生與友人進士楊士芳等募款興建碧霞宮，供奉岳武穆。該宮亦辦鸞務，為僅後於新民主黨之鸞堂。

清德宗光緒二十六年庚子（一九〇〇），先生七十二歲。

二月十五日，日人於臺北淡水館（即清代登瀛書院遺址）開揚文會，臺北、臺中、臺南三縣及宜蘭廳共到會員七十二人；其中宜蘭廳實到十一人，先生與焉，且為廳下會員代表。

清德宗光緒二十七年辛丑（一九〇一），先生七十三歲。

四月，先生所著西行吟草梓行。是書分卷上、卷下，出前有序及詩讚多首，合訂一冊。由先生二子先甲、四子先麟及婿張鏡光同任校訂，但校讎不精，誤植之字甚多。（連橫撰臺灣詩乘卷四有云：「余撰詩乘，搜羅頗廣，而宜蘭作者絕少。後得李靜齋先生西行吟草，展卷一讀，聊慰素心。靜齋（中略）萬里遠游，捧檄而往，一官零落，把卷舊來。詩雖平淡，亦可以知其概。」）

七月初七日（陽曆八月二十日）未時，先生卒於宜蘭西門街刺史第。後葬於一結庄（今宜蘭縣礁溪鄉龍潭村）田中。先生嘗作壽坟自記云：「壽坟擇在四圍埤口一經庄田中，坐口向口，地力頗厚，係哲師張傑甫所扞；蓮花大結，前朝特秀火峰，後樂一字文星，兼有坐帳

貴人；龍虎遶抱，門戶關緊，左金童、右玉女，四勢和平，八水交會，且護纏重重，兜顧有情，堪稱福地；宜蘭平陽中不可多得者也。余求得此穴心殊自慰，百歲後骸骨歸此，據地法論，後代子孫當必有金玉堂之選，第未稔將來驗乎否耶？余到九泉，地下拭目望之，切不可妄聽盲師之言，擅行啓墳改遷。切記切記！倘有不肖子孫，敢違吾訓者，定遭天譴矣！」

附：參考資料

李望洋：西行吟草

劉銘傳：劉壯肅公奏議

洪棄生：寄鶴齋選集

陳淑均：噶瑪蘭廳志

蔣師範：臺灣通志

臺灣銀行經濟研究室：臺灣私法物權編

國防研究院：清史

臺灣省文獻委員會：臺灣省通志（卷首下大事記、卷三政事志行政篇、卷七人物志、卷九革命志抗日篇）

宜蘭縣文獻委員會：宜蘭縣志（卷首、卷五教育志、卷七藝文志、卷八人物志）

智成堂：六合畝元

行忠堂：刪增忠孝集

慎修堂：苦海慈航

王詩琅：日據初期的籠絡政策（載臺灣文獻第二十六卷第四期、第二十七卷第一期合刊）

廖漢臣：揚文會（載臺北文物第二卷第四期）

鄭喜夫：清代臺灣文職表（載臺北文獻直字第十九、二十期合刊，及第二十一、二十二期合刊。）

鄭喜夫：清代臺灣科貢表（未完稿）